



REPUBLIKA E SHQIPËRISË
KËSHILLI I EMËRIMEVE NË DREJTËSI

VENDIM
Nr. 49, datë 05.06.2019

PËR PËRFUNDIMIN E PROCEDURËS SË VERIFIKIMIT TË KANDIDATURËS SË
ZOTIT PREL MARTINI PËR SHKAK TË TËRHEQJES NGA KANDIDIMI PËR
GJYQATAR NË GJYKATËN KUSHTETUESE

Këshilli i Emërimeve në Drejtësi, i përbërë nga:

Ardian Dvorani	- Kryetar
Vitore Tusha	- Zëvendëskryetare/Relatore
Arta Marku	- Anëtare
Margarita Buhali	- Anëtare
Fatjona Memçaj	- Anëtare
Fatri Islamaj	- Anëtar
Eriol Roshi	- Anëtar

Asistuar nga sekretare **Ermelinda Kadiu**,

Me praninë e Avokates së Popullit, **zonjës Erinda Ballanca**, në cilësinë vëzhguesit të përhershëm të mbledhjeve dhe veprimtarisë së Këshillit të Emërimeve në Drejtësi,

Me praninë e përfaqësuesve të autorizuar të subjekteve të ftuara sipas ligjit për pjesëmarrje, në cilësinë e vëzhguesve, në mbledhjen e Këshillit:

- **zotit Bledar Dervishaj**, përfaqësuesit i autorizuar i Presidentit të Republikës,

- **zonjës Mimoza Arbi**, përfaqësuese e autorizuar e Kryetarit të Kuvendit,

në mbledhjen e datës 05.06.2019, mori në shqyrtim çështjen që i përket:

**KANDIDATIT PËR GJYQATAR
NË GJYKATËN KUSHTETUESE:** **Zoti PREL MARTINI**

OBJEKTI: Tërheqje nga kandidimi për gjyqtar në Gjykatën Kushtetuese, për plotësimin e vendit vakant të shpallur nga Presidenti i Republikës në datën 26.11.2018.

KËSHILLI I EMËRIMEVE NË DREJTËSI

Pasi dëgjoi relatimin e anëtares së Këshillit, **zonjës Vitore Tusha**, mendimin e paraqitur nga Avokati i Popullit, zonja Erinda Ballanca, në cilësinë e vëzhgueses së përhershme në mbledhjen dhe veprimtarinë e Këshillit të Emërimeve në Drejtësi, lidhur me mënyrën e procedimit të ndjekur për verifikimin e kandidatit, dhe si bisedoi çështjen në tërësi,

VËREN:

I. Rrethanat e çështjes

1. Në zbatim të nenit 125 të Kushtetutës dhe të pikës 1 të nenit 7/b të Ligjit nr. 8577/2000 “Për organizimin dhe funksionimin e Gjykatës Kushtetuese në Republikën e Shqipërisë”, Presidenti i Republikës, në datën 26.11.2018, ka shpallur hapjen e procedurës së aplikimeve për plotësimin e vendit vakant të krijuar në Gjykatën Kushtetuese pas mbarimit të mandatit të ish-gjyqtares Altina Xhoxhaj.
2. Në përfundim të procedurës së aplikimeve për shprehjen e interesit për kandidim, Presidenti i Republikës i ka dërguar Këshillit të Emërimeve në Drejtësi aplikimet e kandidatëve të shoqëruara me dokumentet e paraqitura prej tyre për përmbushjen e kushteve dhe kriterëve ligjore të përcaktuara në nenin 7/a të ligjit nr. 8577/2000.
3. Ndërmjet kandidatëve që kanë shprehur interesin për plotësimin e këtij vendi vakant të krijuar në Gjykatën Kushtetuese është edhe zotit Prel Martini.
4. Në zbatim të nenit 125 dhe 149/d të Kushtetutës, të pikës 2 të nenit 7/b të ligjit nr. 8577/2000, të nenit 229, 235 e vijues të Ligjit nr. 115/2016 “Për organet e qeverisjes së sistemit të drejtësisë”, si edhe të pikës 98 të aktit nënligjor normativ, Vendimi i Këshillit të Emërimeve në Drejtësi me nr. 4 datë 11.03.2019 “Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”, Këshilli i Emërimeve në Drejtësi, në mbledhjen e zhvilluar në datën 05.04.2019, vendosi fillimin e procedurave të verifikimit, vlerësimit, pikëzimit dhe renditjes të kandidatëve që kanë shprehur interesin për vendet vakante të krijuara në Gjykatën Kushtetuese.
5. Në zbatim të nenit 228 të Ligjit nr. 115/2016 dhe të pikave 5, 27 deri 37 dhe 41 të aktit nënligjor normativ, Vendimit të Këshillit të Emërimeve në Drejtësi nr. 2 datë 15.02.2019 “Për procedurën e shortit të caktimit të relatorëve për pozicionet vakante në çdo institucion”, si edhe të pikës 4 të Vendimit të Këshillit të Emërimeve në Drejtësi nr. 4 datë 11.03.2019 “Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”, në të njëjtën ditë të mbledhjes së zhvilluar në datën 05.04.2019, është realizuar edhe procedura për caktimin me short manual të relatorëve për secilin nga vendet vakante të krijuara në Gjykatën Kushtetuese dhe për Inspektor i Lartë i Drejtësisë.
6. Sipas rezultatit të shortit manual të realizuar nga Këshilli i Emërimeve në Drejtësi, lidhur me vendin vakant në Gjykatën Kushtetuese, të shpallur nga Presidenti i Republikës në datën 26.11.2018, relator për ndjekjen e procedurave të verifikimit, vlerësimit, pikëzimit dhe renditjes së kandidaturave, është caktuar anëtarja e Këshillit, zonja Vitore Tusha.
7. Zoti Prel Martini, si një ndër kandidatët që ka shprehur interesin për vendin vakant të sipërcituar në Gjykatën Kushtetuese, në zbatim të pikës 22 të Vendimit të Këshillit të Emërimeve në Drejtësi me nr. 4 datë 11.03.2019 “Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”, është njoftuar për tu paraqitur pranë Këshillit për të vijuar me përmbushjen e procedurave të verifikimit të kandidaturës.

8. Në kushtet e pamundësisë së komunikimit në adresën e deklaruar, si edhe të mungesës së deklarimit prej tij të një adrese elektronike komunikimi, është kryer njoftimi edhe nëpërmjet SMS-së në numrin e kontaktit të deklaruar nga vetë kandidati Prel Martini, pa marrë asnjë përgjigje. Gjithashtu ky kandidat është telefonuar në po të njëjtin numër telefonik, në datën 09.04.2019 ora 14:29, numër i cili ka rezultuar i mbyllur dhe me veprimet në vijim nuk është bërë i mundur kontaktimi me këtë kandidat, sipas dokumentacionit që gjendet i administruar në dosjes e kandidimit.

9. Kandidati Prel Martini nuk është paraqitur pranë Këshillit të Emërimeve në Drejtësi për tu pajisur me formularët e deklarimit dhe autorizimet që duhet të plotësohen për qëllimet e vijimit të procedurës së verifikimit të kandidaturës së tij.

10. Gjithashtu, si përpara, ashtu edhe pas fillimit të procedurave të verifikimit në datën 05.04.2019, kandidati Prel Martini nuk ka treguar interes për të komunikuar me Këshillin, si edhe as nuk i ka komunikuar ndonjëherë Këshillit ndryshimet që ka kryer në adresa, numra kontakti telefonik të deklaruara prej tij apo nuk ka deklaruar ndonjë adrese elektronike për qëllimet e komunikimit me të në procedurën ligjore të verifikimit dhe vlerësimit të kandidaturës.

11. Pas kryerjes së veprimeve procedurale të sipërcituara, në zbatim të shkronjës “dh” të pikës 1 të nenit 7/a të Ligjit nr. 8577/2000 dhe të pikës 4 të nenit 235 të Ligjit nr. 115/2016, si edhe të pikave 30 dhe 76 të Vendimit të Këshillit të Emërimeve në Drejtësi nr. 4 datë 11.03.2019 *“Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”*, është përgatitur ky relacion që përmban përshkrimin e procedurës së zhvilluar, së bashku me materialet e procedurës së ndjekur, në datën 30.05.2019, i janë dërguar për kompetencë dhe shqyrtim mbledhjes së Këshillit të Emërimeve në Drejtësi.

12. Në zbatim të pikës 33 të Vendimit të Këshillit të Emërimeve në Drejtësi nr. 4 datë 11.03.2019 *“Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”*, Kryetari ka thirrur mbledhjen e Këshillit duke njoftuar anëtarët për zhvillimin e saj në datën 31.05.2019, rendin e ditës, si edhe duke i bashkëlidhur njoftimit materialet e çështjes. Në rendin e ditës është përfshirë për vendimmarrje edhe çështja me gjetjet në procedurën e verifikimit të kandidimit të zotit Prel Martini, për vendin vakant në Gjykatën Kushtetuese të shpallur nga Presidenti i Republikës në datën 26.11.2018.

13. I njëjti njoftim, së bashku me materialet e çështjes i janë dërguar edhe Avokatit të Popullit.

14. Për zhvillimin e mbledhjes së Këshillit në datën 31.05.2019 dhe rendin e ditës janë njoftuar edhe subjektet që sipas ligjit ftohen të marrin pjesë në mbledhjet e Këshillit.

15. Për shkak të pamundësisë së shqyrtimit të çështjeve të përfshira në pikën e rendit të ditës lidhur me gjetjet në procedurat e verifikimit të kandidaturave, përfshirë atë të kandidati Prel Martini, në mbledhjen e datës 31.05.2019, Këshilli vendosi shqyrtimin e tyre në mbledhjen e datës 05.06.2019.

16. Në mbledhjen e Këshillit, pas relatimit të parashtruar nga anëtari relator dhe shpjegimeve mbi pyetjet sqaruese të drejtuara nga anëtarët e Këshillit, Këshilli dëgjoi mendimin e Avokatit të Popullit lidhur me mënyrën e procedimit të ndjekur për verifikimin e kandidati.

17. Në thelb, Avokati i Popullit parashtrroi se: Komunikimi i vetëm që Këshilli ka bërë me kandidatin është me sms dhe thirrje nëpërmjet kontakteve të numrit telefonik, ndërkohë nuk rezultoi komunikim me e-mail ose adresë postare. Nga ana tjetër, mendojmë se është më i drejtë gjetja dhe propozimi i relatores jo për ndalim por për mbyllje të procedurës së verifikimit, duke pasur parasysh përfundimit e afatit për qëndrimin në detyrë të vakancës plotësuese ku është kandiduar zoti Prel Martini, e cila ka përfunduar në 22.05.2019.

II. Vlerësimi i Këshillit të Emërimeve në Drejtësi

18. Këshilli i Emërimeve në Drejtësi, duke pasur parasysh dispozitat ligjore dhe ato nënligjore normative të sipërcituara, bazuar në relacionin dhe aktet e dërguara nga anëtari i Këshillit relator i caktuar për ndjekjen e procedurave për vendin vakant në Gjykatën Kushtetuese të shpallur nga Presidenti i Republikës në datën 26.11.2018, vlerëson se duhet të procedojë me vendim për përfundimin e procedurës së verifikimit, vlerësimin, pikëzimin dhe renditjes së kandidatit Prel Martini.

19. Në pikën 1 të nenit 7/b të Ligjit nr. 8577/2000 parashikohet se për plotësimin e vendeve vakante që krijohen në Gjykatën Kushtetuese, Presidenti i Republikës:

“1. shpall në mjetet e informimit publik dhe në faqen zyrtare të internetit hapjen e procedurës së aplikimit. Aplikimet e kandidatëve të shoqëruara me dokumentet që vërtetojnë përmbushjen e kushteve dhe kriterëve të përcaktuara në nenin 7/a paraqiten pranë Presidentit të Republikës, i cili ia dërgon ato Këshillit të Emërimeve në Drejtësi.”

20. Në zbatim të nenit 7/b të Ligjit nr. 8577/2000 dhe të nenit 234 e vijues të Ligjit nr. 115/2016, pas dërgimit të listës së kandidatëve që kanë shprehur interes së bashku me dokumentacionin e paraqitur, për vendin vakant në Gjykatën Kushtetuese të shpallur nga Presidenti i Republikës në datën 26.11.2018, Këshilli i Emërimeve në Drejtësi ka filluar në datën 05.04.2019 procedurën e verifikimit të kandidaturave për plotësimin e kushteve dhe kriterëve të kandidimit që parashikohen nga Kushtetuta dhe ligji.

21. Ligji nr. 8577/2000 dhe Ligji nr. 115/2016 nuk parashikojnë në mënyrë të shprehur rastin e tërheqjes nga kandidimi dhe mënyrën e disponimit të Këshillit të Emërimeve në Drejtësi në raste të tilla.

22. Por, nga ana tjetër, Ligji nr. 115/2016, në pikën 2 të nenit 229, parashikon se :

“2. Këshilli i Emërimeve në Drejtësi, për të siguruar zhvillimin e një procedure transparente, publike dhe bazuar në merita, me vendim, miraton rregulla më të detajuara për përzgjedhjen dhe pikëzimin e kandidatëve, duke përfshirë edhe rregullat për procedurën e verifikimit të pasurisë, integritetit dhe të së shkuarës profesionale dhe personale të tyre.”

23. Bazuar në këtë detyrim dhe delegim ligjor për të miratuar, në bazë dhe për zbatim të ligjit, rregulla më të detajuara normative, Këshilli i Emërimeve në Drejtësi ka nxjerrë aktin nënligjor normativ, vendimin nr. 4 datë 11.03.2019 *“Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”*.

24. Në lidhje me rastin e tërheqjes nga kandidimi, në vendimin nr. 4 datë 11.03.2019 të Këshillit të Emërimeve në Drejtësi, në pikën 8, parashikohet se :

“8. Kandidati ka të drejtë të tërhiqet në çdo kohë nga kandidimi, duke e njoftuar me shkrim Këshillin. Pas këtij njoftimi, Këshilli vendos menjëherë përfundimin e procedurës së verifikimit të kandidatit. Akti i Këshillit për konstatimin e tërheqjes nga kandidimi i njoftohet menjëherë kandidatit dhe bëhet publik në faqen zyrtare të Gjykatës së Lartë, në pjesën e caktuar për Këshillin e Emërimeve në Drejtësi.”.

25. Këshilli i Emërimeve në Drejtësi, në zbatim të drejtë të dispozitave ligjore dhe atyre nënligjore normative të zbatueshme në rastin e tërheqjes nga kandidimi, vlerëson të rregullt procedurën e ndjekur deri tani për verifikimin e kandidaturës së kandidatit Prel Martini. Kandidati është njoftuar rregullisht për fillimin e kësaj procedure, sipas rrugës elektronike në datë 05.04.2019.

26. Gjithashtu, nga aktet që përmban dosja e kandidimit, rezulton që zoti Prel Martini, si një ndër kandidatët që ka shprehur interesin për vendin vakant të sipërcituar në Gjykatën Kushtetuese, në zbatim të pikës 22 të Vendimit të Këshillit të Emërimeve në Drejtësi me nr. 4 datë 11.03.2019 *“Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”*, është njoftuar për tu paraqitur pranë Këshillit për të vijuar me përmbushjen e procedurave të verifikimit të kandidaturës, nëpërmjet kontakteve, ndonëse jo të plota, të deklaruara prej tij.

27. Në kushtet e pamundësisë së komunikimit në adresën e deklaruar, si edhe të mungesës së deklarimit prej tij të një adrese elektronike komunikimi, është kryer njoftimi edhe nëpërmjet SMS-së në numrin e kontaktit të deklaruar nga vetë kandidatit Prel Martini, pa marrë asnjë përgjigje. Gjithashtu ky kandidat është telefonuar në po të njëjtin numër telefonik, në datën 09.04.2019 ora 14:29, numër i cili ka rezultuar i mbyllur dhe me veprimet në vijim nuk është bërë i mundur kontaktimi me këtë kandidat, sipas dokumentacionit që gjendet i administruar në dosjes e kandidimit.

28. Pavarësisht ezaurimit të veprimeve procedurale të njoftimit, kandidati Prel Martini jo vetëm nuk është paraqitur pranë Këshillit të Emërimeve në Drejtësi, por edhe si përpara, ashtu dhe pas fillimit të procedurave të verifikimit në datën 05.04.2019, nuk ka treguar interes për të komunikuar me Këshillin, si edhe as nuk i ka komunikuar ndonjëherë Këshillit ndryshimet që ka kryer në adresa, numra kontakti telefonik të deklaruara prej tij apo nuk ka deklaruar ndonjë adrese elektronike për qëllimet e komunikimit me të në procedurën ligjore të verifikimit dhe vlerësimit të kandidaturës.

29. Në të tilla rrethana, Këshilli i Emërimeve në Drejtësi vlerëson se kandidati Prel Martini, jo vetëm nuk ka përmbushur detyrimin e tij për të njohur Këshillit me adresat dhe kontaktet e ndryshuara prej tij përkundrejt atyre të deklaruara në kandidim, por edhe nuk ka treguar asnjë interes për procedurat e verifikimit të kandidaturave, për fillimin e të cilave, krahas njoftimeve individuale, Këshilli ka bërë edhe njoftim publik të reflektuar gjerësisht nga mjetet e informimit publik.

30. Për rrjedhojë, Këshilli i Emërimeve në Drejtësi vjen në përfundimin se, ky kandidat, me sjelljen dhe mosveprimin e tij tregon se nuk ka më interes dhe është i tërhequr nga kandidimi për vendin vakant në Gjykatën Kushtetuese të shpallur nga Presidenti i Republikës në datën 26.11.2018.

31. Këshilli vlerëson që shprehja e interesit dhe kandidimi për plotësimin e vendeve vakante që krijohen në Gjykatën Kushtetuese është një e drejtë, e cila ushtrohet nga kandidatët ekskluzivisht mbi vullnetin individual të tyre, duke respektuar procedurat, kushtet dhe kriteret e kandidimit që parashikon Kushtetuta dhe ligji.

32. Së fundi, Këshilli i Emërimeve në Drejtësi konstaton se vakanca plotësuese për gjyqtar në Gjykatën Kushtetuese, e shpallur nga Presidenti i Republikës në datën 26.11.2018, shërbente për të plotësuar vendin përkatës vakant deri në datën 22.05.2019, afat i cili tashmë është tejkaluar pa qenë e mundur përfundimi i procedurave ligjore nga ky Këshill dhe organi i emërtesës. Madje, për të njëjtin vend vakant, me mandat të plotë, Presidenti i Republikës ka shpallur të hapur konkurrimin për kandidatë të interesuar, të cilët janë subjekt i procedurave të verifikimit që po realizohen nga ky Këshill.

PËR KËTO ARSYE:

Në mbështetje të pikës 1 të nenit 149/d të Kushtetutës, të pikës 2 dhe 3 të nenit 229 të Ligjit nr. 115/2016 “*Për organet e qeverisjes së sistemit të drejtësisë*”, si edhe të pikave 8 dhe 31 të Vendimit të Këshillit të Emërimeve në Drejtësi nr. 4 datë 11.03.2019 “*Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë*”, Këshilli i Emërimeve në Drejtësi

VENDOSI:

1. Përfundimin e procedurës së verifikimit, vlerësimit, pikëzimit dhe renditjes së kandidaturës të zotit Prel Martini, për shkak të tërheqjes nga kandidimi për vendin vakant për gjyqtar në Gjykatën Kushtetuese, të shpallur nga Presidenti i Republikës në datën 26.11.2018
2. Në zbatim të nenit 238 të Ligjit nr. 115/2016, ky vendim i njoftohet kandidatit Prel Martini.
3. Kandidati Prel Martini ka të drejtën e ankimit në Gjykatën Administrative të Apelit, jo më vonë se 5 ditë nga dita e njoftimit të vendimit të arsyetuar.
4. Ky vendim publikohet në faqen zyrtare të Gjykatës së Lartë, në pjesën e përcaktuar për Këshillin e Emërimeve në Drejtësi.

KRYETARI

Ardian DVORANI

